

36 500 persunas dadas 2014 or da la rait sociala

In studi da la Caritas mussa che quel dumber crescha

(anr) L'onn 2014 èn na main che 36 500 persunas dadas or da la rait sociala. Il tudestg dovra persuerter il pled «ausgesteuert». Quai è il pli aut dumber dapi 2005. Il medem mument èn era las prestaziuns a basegnus vegnidas reducidas e tals stuschads pli e pli a l'ur da la povradad. La Caritas svizra, l'ovra d'agid catolica, s'occupa onn per onn da quels fatgs.

Situaziun da partenza

Tgi che perda sia piazza e sa lascha registrar tar il Center regiunal d'intermediaziun da lavur (CRI) e chatta entaifer dus onns nagina nova piazza croda or da la rait sociala (vegn pia «ausgesteuert»). Quest dumber è creschì ils davos onns. L'onn 2014 era i 3000 carstgauns il mais – pia en tut 36 500. Quai è prest il dubel

dapli che quels ch'èn crudads 2008 or da la rait sociala.

Daventan dependents da l'agid social

Il pli fitg èn persunas sur 45 onns pertutgadas: esters (da l'exteriur), dunnas, tals che vivan sulets u persunas che n'han gi nagina scolaziun pli suenter la scola obligatoria. Numerus da quels na survegnan betg pli lavur suenter esser crudads or da la rait sociala e daventan uschia dependents da l'agid social. E tgi che chatta in job sto savens sa cuntentar cun lavur malsegira, lavurar temporalmein sin clom u avair be in pitschen pensum.

590 000 pertutgads da la misergia

Ils custs fixs da viver creschan, oravant tut tar las premias da las cassas da mal-

sauns ed ils tschains per abitar. Blers han misergia da segirar lur existenza. Da preschent èn 590 000 carstgauns pertutgads en Svizra da la paupradad. 130 000 dad els èn povers, malgrà ch'els lavuran.

Segund la Caritas vegnan era las prestaziuns socialas reducidas adina dapli. Tenor ella n'èsi betg da giustificgar che 250 000 geniturs ed uffants èn pertutgads en Svizra da la paupradad.

La Caritas pretenda perquai ina politica da famiglia ch'impedescha povradad. Sut il motto «Famiglia n'è nagin luxus» vegn ella ad arranschar en curt in forum a Berna cun spezialists davart quella problematica e tscherugar strategias e schliaziuns per ina giusta politica.